



閒談過年

盡多人講緊老緊驚過年，佢敢係老人成細子，長下尾牙一過，就像細人仔樣，望等年到。這可能係因為過年一溜來就分佢盡好个記憶。

對舊曆十二月二十五入年假開始，佢兜細人仔就享受著過年个好處咧，阿姆吩咐愛聽講，做毋得講了少話。這日開始，大人也毋會動啊著打、罵細人仔，就算打爛碗、做錯事，乜開容笑面用勸話、講好嘴。細人仔為著砵年錢、買新衫，平時雖然相捶鬥打，這下也毋敢冤家、相打，多細人仔个家庭，就這時正有好恬靜。

入年假一到，阿姆就準備炊板咧，長下第先炊个係菜頭板，該央時，愛過年正有這種板好食。細人仔緊頭勾勾看板炊好冇，阿姆看著佢兜咁咁仔等食，板一炊好，還軟軟切得，就用飯匙添一大角到佢兜个碗肚，冷颼颼个天食等燒爐燒个板，幸福、滿足个感覺在心肝底升起。到板切得得，阿姆就換用煎个，煎到香香个菜頭板，又係另一種好味緒。

過年除了有滿桌豐豐沛沛个菜，還有生仁糖、冬瓜糖、麻米粿這兜拈甜个糖果，細人仔食到嘴就合毋密。在該無豐湧个年代，當多人過年个新衫係讀書个制服，毋過著起來還係暢樂樂、風神咁仔。最暢个還係有砵年錢好拿，雖然長下左手接著錢，正手就交分阿姆囤起來，一囤就毋識轉來，但係拿著錢个快樂從來無減少！

年初五出年假，對細人仔來講，年就安到過忒咧，飯桌頂个雞肉盤消失咧，糖仔也食忒咧，大人又做得罵人咧，細人仔就像在天堂跌落凡間，該種失落，久久毋散。一日一日、一個節氣一個節氣過，又望等另一隻年遽遽到。

到這下，幾十個年過去咧，佢見想著過年時，一屋人放下頭路，共下行行春、打打嘴鼓、和和接接團圓个日仔，就特別期待年个到來。

作者：張美容

☆詞彙學習☆

【相捶鬥打】siong` chui deu` da`：打架。

【頭勾勾】teu gieu` gieu`：伸頭張望。

【咁咁仔】goi` rhog rhog er：流口水想吃的樣子。

【生仁糖】sen` rhin tong：一種用白色或粉紅色糖粉包裹著花生的糖果。

【暢樂樂】tiong` lag` lag`：很高興。

【行春】hang chun`：踏春、走春。

☆文法學習☆

【第先】ti+ sen`：最先。為「第一先」一詞的縮寫，通常口語上會因為加強語氣的緣故，音變讀為「ti` sen`」。例如：第好（最好）、第尾（最後）、第靚（最美）。